

ORDE do 3 de setembro de 2021 pola que establecen as bases reguladoras das axudas para o fomento da utilización de maquinaria agrícola en réxime asociativo en Galicia, financiadas co instrumento de recuperación da Unión Europea (EURI), no marco do Programa de desenvolvemento rural (PDR) de Galicia 2014-2020, e se convocan para o ano 2021. Consellería do Medio Rural. (DOG Nº 182, 21/09/2021)

OBXECTO.

Esta orde ten por obxecto establecer as bases reguladoras para a concesión das axudas, en réxime de concorrencia competitiva, para a utilización de maquinaria agrícola en réxime asociativo no marco do PDR de Galicia 2014-2020, financiadas co instrumento de recuperación da Unión Europea (EURI), cunha participación do 100 % de fondos da UE, dentro da medida 4 Investimentos en activos físicos, submedida 4.18 Apoio aos investimentos nas explotacións agrícolas (código de procedemento MR351A Axudas para o fomento do asociacionismo na utilización de maquinaria e equipamentos agrarios en réxime asociativo en Galicia), así como convocalas para o ano 2021

Esta axuda ten como finalidade:

- a) Promover a utilización de maquinaria e equipamentos de carácter agropecuario en réxime asociativo.
- b) Fomentar a introdución de novas tecnoloxías no emprego de maquinaria e equipamentos.
- c) Racionalizar os custos de mecanización, incrementar os mecanismos de seguranza no traballo, reducir as emisións contaminantes e fomentar o aforro enerxético, na procura dunha mellora da calidade de vida no medio rural.

BENEFICIARIOS.

Poderán ser beneficiarios das axudas reguladas nesta orde:

- a) As **cooperativas agrarias**.
- b) As **cooperativas de explotación comunitaria da terra de 5** ou menos anos de antigüidade.
- c) As **sociedades agrarias de transformación procedentes da fusión** de polo menos dúas explotacións, nos últimos 5 anos naturais. En diante SAT de fusión.

INVESTIMENTOS SUBVENCIONABLES.

1. Os investimentos subvencionables son os seguintes:

- a) Maquinaria agrícola.
- b) Estudos técnico-económicos de viabilidade.

2. Non se subvencionarán:

- a) A mera reposición ou adquisición de maquinaria de segunda man ou usada.
- b) Non se considerarán subvencionables o IVE e outros impostos.
- c) Os investimentos en maquinaria ou equipamentos relacionados coa transformación e comercialización de produtos agrarios ou forestais, nin máquinas de pequena significación para os efectos do conxunto dos socios da agrupación.
- d) A maquinaria e os equipamentos de carácter forestal.
- e) Colleitoras de forraxes cun uso previsto menor de 500 horas anuais.
- f) A maquinaria de aplicación de xurro mediante sistemas de prato, abano ou canóns.

3.- En aplicación da moderación de custos, **fíxase en 1.000 € o custo elixible para os estudos técnicos-económicos de viabilidade.**

4. Establécese un **investimento elixible mínimo de 20.000 €** para poder ser subvencionable. O volume total do **investimento elixible máximo** subvencionable para cada **beneficiario será de 250.000 €**. No caso de **cooperativa procedente de fusión**, en que o número total de socios da entidade fusionada sexa superior a 1.000, o límite máximo de **investimento será de 600.000 €**

COMEZO DA SUBVENCIONABILIDADE

Serán **subvencionables os gastos efectuados con posterioridade á presentación da solicitude da axuda** en tempo e forma tras a correspondente convocatoria pública, tendo en conta que a simple presentación da solicitude en ningún modo garante a súa aprobación.

CONTIA ECONOMICA DAS AXUDAS

O importe da axuda **será do 35 % dos custos elixibles**, que poderá incrementarse ata un **máximo do 50 %** en función da aplicación dos seguintes criterios:

- 1. **5 % no caso** de investimentos en **zonas con limitacións naturais** ou outras limitacións específicas recollidas no artigo 32 do Regulamento (UE) 1305/2013.
- 2. **10% no caso de investimentos colectivos**, cando o **beneficiario procede dunha fusión**.

CRITERIOS DE SELECCIÓN DE OPERACIÓNS

- 1. **Ordenaranse as solicitudes presentadas de acordo cos criterios de prioridade** indicados neste artigo e aprobaranse os proxectos de maior a menor puntuación ata esgotar o orzamento dispoñible.

2. Establécense os seguintes criterios de prioridade:

a) Atendendo á tipoloxía da entidade solicitante:

- i. Cooperativa agraria con sección/servizo de maquinaria: 5 puntos.
- ii. CUMA: 4 puntos.
- iii. SAT procedente de fusión ou cooperativas de explotación comunitaria da terra: 3 puntos.

b) Atendendo ao valor contable do parque de maquinaria no momento da solicitude de axuda:

- i. Parque de maquinaria con valor contable igual ou superior a dous millóns de euros: 3 puntos.
- ii. Parque de maquinaria con valor contable igual ou superior a un millón de euros e inferior a dous millóns: 2 puntos.
- iii. Parque de maquinaria con valor contable superior a medio millón de euros e inferior a un millón: 1 punto.
- iv) Parque de maquinaria con valor contable inferior a medio millón de euros: 0 puntos.

c) Atendendo á facturación media aos socios do parque de maquinaria nos tres anos anteriores ao ano de solicitude da axuda:

- i. Facturación media do parque de maquinaria igual ou superior a un millón de euros: 3 puntos.
- ii. Facturación media do parque de maquinaria igual ou superior a medio millón de euros e inferior a un millón: 2 puntos.
- iii. Facturación media do parque de maquinaria igual ou superior a cen mil euros e inferior a medio millón: 1 punto.

d) Atendendo á porcentaxe de mulleres que integren o consello reitor da entidade solicitante:

- i. > 50 %: 2 puntos.
- ii. Do 30 % ao 50 %: 1 punto.

e) Investimentos en proxectos innovadores: 1 punto.

f) Investimentos en proxectos de cooperación: 1 punto.

3. En caso de igualdade na aplicación do baremo, terán **prioridade as entidades solicitantes con investimentos en proxectos innovadores, seguido polos investimentos en proxectos de cooperación**. Se aínda persiste o empate, priorizarase segundo a orde indicada nos criterios de selección.

4. As solicitudes **cunha puntuación inferior a 5 puntos non serán subvencionables** por non alcanzar os criterios de priorización mínimos.

XUSTIFICACIÓN E PAGAMENTO

1. O prazo de xustificación destas axudas remata o 1 de maio de 2022, inclusive.

PRAZO DE SOLICITUDES

O prazo xeral para a presentación de solicitudes **finalizará o 21 de outubro de 2021**